

Configurazione territoriale della diocesi di San Marino-Montefeltro

Con lettera n. 644/76 del 2 marzo 1977 la Sacra Congregazione per i Vescovi ha trasmesso alla Segreteria Generale della C.E.I. il Decreto del 22 febbraio 1977 col quale viene data una nuova configurazione territoriale alla diocesi di Montefeltro, che d'ora in poi prende la denominazione di San Marino-Montefeltro.

SACRA CONGREGATIO PRO EPISCOPIS

PROT. N. 644/76

FERETRANAE

DE DIOECESIS RECOGNITIONE

DECRETUM

Proprius dioecesis assequendus finis postulat ut eadem congruenter distributum territorium habeat et unitatem organicam, quoad personas, officia, instituta perspicue manifestet, ita ut Episcopus munera sua pastoralia in ea efficaciter explere valeat.

Ut haec ubique instaurentur consilia decrevit Sacrosancta Oecumenica Synodus Vaticana II, ut ad congruam dioecesium recognitionem deveniretur, quatenus animarum bonum id exigeret (*Ch. Dom. 22-23*).

Regio exstat *Montefeltro* nuncupata quae Feretranam dioecesim a priscis temporibus comprehendit, cuius populus psychologica, oeconomica, geographica ratione unam efficit demographicam portionem dum vero territorium eius in plurium dioecesium fines extenditur.

Nec praetermitti potest Feretranam Ecclesiam in suo territorio potiore Sammarinensis reipublicae partem comprehendere, immo civitatem ipsam Sammarinensem continere, quae eiusdem nominis reipublicae caput est et magistratum publicorumque munerum sedes.

Quapropter, praehabito favorabili voto Conferentiarum Italicae nationis et Regionum pastoralium Emiliae-Flaminiae necnon Picenae sacrorum Antistitum, atque ceterisque quorum interest auditis, Summus Pontifex Paulus, Divina Providentia Pp. VI, quo uberius in Feretrana dioecesi totius communitatis vita novo florescat vigore, de plenitudine apostolicae potestatis, suppleto, quatenus opus sit, eorum interesse habentium vel habere praesumentium consensu, quae sequuntur decernit.

1. Sammarinensem rempublicam, christianae sanctitatis memoriis praecellentem, congruo honore cohonestare atque magis magisque virtutum bonorumque copia augere cupiens, peculiari apostolicae suae benevolentiae signo, Summus Pontifex Sammarinensem titulum, ab eiusdem nominis republica, perpetuo veteri Feretrano titulo unit, ita ut posthac dioecesis et Episcopus Sammarinensis-Feretrans nuncupari possit ac debeat.

2. Geographicae dioecesis unitati amplius consulens idem Summus Pontifex Sammarinensi-Feretranae Ecclesiae adnectit paroecias vulgo *Serravalle et Faetano* una cum duobus vicariis curatis *Falciano* et *Dogana* appellatis, quas a dioecesi Ariminensi separat, ita ut integrum Sammarinensis reipublicae territorium in unam eandemque dioecesim extendatur.

Insuper, ut unitas iurisdictionis in eodem municipio efficiatur, a dioecesi Sarsinatensi disiungit et Sammarinensi-Feretranae Ecclesiae unit paroecias *Rivolparò*, *Sapigno in Romagnano* appellatas, intra fines municipii vulgo *Sant'Agata Feltria* sitas et partem territorii paroeciae *Pagno* ad huiusmodi municipium pertinentem; pariter a dioecesi Sammarinensi-Feretrana paroecias seiungit *Serra di Tornano* et *Tornano* nomine, in territorio erectas municipii vulgo *Mercato Saraceno*, quas Sarsinatensi Ecclesiae tribuit. Eandem ob causam a dioecesi Sammarinensi-Feretrana distrahit paroecias *Genestreto*, *Massamanente*, *Montebello*, *Montegelli*, *Montetiffi*, *Pietra dell'Uso*, *Ponte Uso*, *S. Maria Riopetra*, *Savignano di Rigo*, *Strigara*, *Vignola* nuncupatas, in territorio extantes municipii vulgo *Sogliano al Rubicone*, quas Ariminensi Ecclesiae addit. Ab hac vero separat et Sammarinensi-Feretranae dioecesi adnectit paroecias *Gesso*, ad municipium vulgo *Sassofeltrio pertinentem et Piandicastello*, in territorio municipii *Mercatino Conca* nomine sitam. Denique Exc.mo Sammarinensi-Feretrano pro tempore Ordinario officium committitur examini subiciendi — una cum Episcopis quorum interest — ceteras suae dioecesis finium mutationes quas fortasse aptior pastoralis Regionis ordinatio exigat, quaeque meliori ratione ad actum deducantur.

Quam ob rem documenta et acta praefatarum paroeciarum clerum, fideles et bona temporalia forte respicientia, a Curia a qua ad Curiam dioecesis cui paroeciae ascriptae erunt transmittantur, in propriis archivis custodienda.

Ad clerum quod attinet, simul ac praesens Decretum ad effectum deductum fuerit, sacerdotes dioecesi illi censeantur adscripti in cuius territorio beneficium aut officium legitime detinent; ceteri autem clerici dioecesi illi incardinati maneant vel incardinentur, in cuius territorio legitimum habent domicilium. Uniuscuiusque tamen dioecesis Ordinariis fas est — ob congruas rationes — collatis consiliis cum sacerdotibus et clericis quorum interest, aliter eorum incardinationem disponere.

3. Cum Sammarinensis-Feretrana Ecclesia, huiusmodi recognitione, Regionis Aemiliae-Romandiolae socialis atque religiosae vitae conditionibus potius conformetur, statuit denique Sanctitas Sua, ut Episcopus Sammarinensis-Feretranus non amplius in Regionis pastoralis Picenae sed in Aemiliana-Flaminiae Regionis Episcoporum coetum coalescat et conveniat.

Iisdem fretus consiliis Sammarinensem-Feretranam dioecesim suffraganeam constituit metropolitanae Ravennatensis Ecclesiae et proinde a metropolitico iure Urbinatensis Archiepiscopi subtrahit.

Quae ad actum deducantur, Summus Pontifex Exc.mum P. D. Ersilium Tonini, Archiepiscopum Ravennatensem, deputare dignatus est, honore imposito ad sacram Congregationem pro Episcopis authenticum exemplar actus peractae executionis remittendi.

His super rebus praesens edi iussit sacrae Congregationis pro Episcopis Decretum, perinde valiturum ac si Apostolicae sub plumbo Litterae datae forent.

Contrariis quibusvis minime obstantibus.

Datum Romae, ex Aedibus sacrae Congregationis pro Episcopis, die 22 mensis Februarii anno 1977.

+ SEBASTIANUS CARD. BAGGIO, *Praefectus*

L. S.

+ ERNESTUS CIVARDI, Archiep. tit. Serdicens., *a Secretis*